



# CANTIC NEVEZ

*Composet var Buez an Abostol, Pring an Ebestel, Sant Pêr,*



Var ton : *Güerz Sant Ales.*

**C**LÉVIT cana eur Vuez zo nevez composet,  
Grêt da Bring an Ebestel, Sant Pêr e zê hanvet,  
Pehini zo enoret e pèvar c'horn ar bed :  
Nep a glêvo e c'hana a vezo ravisset.

Brêma me a zisclêrio d'ar bed oll en antier  
Ar Vuez, ar miraclou eus an Autrou Sant Pêr ;  
Penos en deus recevet alc'hoes ar Barados,  
Evit cass ar Gristenien eun deiz d'y da repos.

Sant Pêr, Abostol, a voa natif a C'halilee,  
Hac a voa pesqetaer, hervez m'eo e Vue ;  
E vreur a voa Sant Andre ; hor Zalver er galvas ;  
Ha ma quïttas e vicher da heuill ar Messias.

Bet en deveus ar pouvoar eus a zorn ar Messi  
D'amari ar pec'hejou, ha d'o disamari ;  
ArVêleyen abaoe ivez o deus-y bet :  
Nep na heulio ar Zant-mâ, biqen na vo salvet.

Lézomp ar privilachou pere en deveus bet  
An Abostol beniguet digant Salver ar bed ;  
Canomp brêmâ an daêlou pere en deus scuillet,  
P'en devoa e Vestr Jesus e tal an tâu nac'het.

D'an nos eus ar Yaou-Gamblit, Jesus en deus laret  
E vije abandonet dre' vrasa mignonet;  
Sant Pêr a zavas dious tol, hac a lavar neuze;  
Me ho heuillo, va mestr qer, bete coll va bue.

Jesus a respont da Bêr, ractal ma er c'hlévas;  
Aroc ma cano ar c'hoq, te am nac'ho, siouas?  
Partia ra hor Zalver d'ar Jardin Olivet,  
Da offr d'e Dad Eternel e Bassion galet.

Dont a ra ar zoudardet evit e guemeret;  
Judas' d'e drahissa; Sant Pêr en deus troc'het  
Ar scoùarn deo da Valcus etouez ar zoudardet,  
Abalamour ma vele e vestr qer goal-drêtet

Laqat a reas Jesus ar scoùarn en e blaç;  
O tistrei ouz Pêr neuze, truezus e lavas :  
Ar muntr a zo difennet; ho cleze dastumet :  
Nep a scoyo gant cleze, gant cleze vo lazet.

Pa en devoe hor Zalver lavaret qementse,  
E saillas an dud barbar neuze souden varne,  
D'en amari gant qerden evel eur sorcer bras,  
Ha treinet dre ar vouillen da bales Caïphas.

Pêr, o heulia hor Zalver, a velàn zo spontet,  
Pa vel e voa qemeret gant an dud arraget,  
Heulia a ra hor Zalver da bales Caïphas,  
Hac en monet da domma, an amzer voa yen bras.

Eur vatez eus ar pales er güelas o tomma,  
Ha prest en anavezas, ma c'houlennas ountâ :  
Te a zo eur c'hamarad demeus ar fals Prophet,  
Pehini zo en nos-mâ er jardin qemeret.

O lachete effroyabl eus an Abostol-màn !  
Lavarat a ra penos n'anav qet anezan !  
Proferi a ra teir güech e vlasphem milliguet;  
Ebars ar memes instant ar c'hoq en deus canet.

Er memes amzer, Jesus en deveus bet sellet  
Oc'h e Abostol Sant Pêr, ha dezàn lavaret :  
Pêr? gant da gomzou, siouas! eo va c'halon rannet;  
Goas eguet va zourmanchou abers ar zoudardet.

Onnes eo ar bromessa a poa-e din-me grêt  
Penos betec ar maro e pije va heuillet?  
Te zo porsier an Envou, hac ec'h eus va zromplet!  
Sorti buan, den ingrat da vouela da bec'het.

Sant Pêr, pa en deus clêvet comzou Salver ar bed,  
E galon a zo rannet, hac e zeo sortiet  
D'ober epad e vuez eur binigen galet :  
Prestit hoc'h attantion, m'ho ped, asistantet :

Gant bara zec'h ha louzou, ha dour pur a eve,  
An douar yen da gousqet en devoa da vele :  
Hervez m'en deus rapportet an Autrou Sant Gregoar,  
Pa glêve cana ar c'hoq, e vouele gant glac'har.

Goude ma voe bet pignet hor Zalver bars en êe,  
Ec'h assambles en eur gambr an Disqibien neuze,  
Evit choas un Abostol ebars e plaç Judas,  
Pini voa êt gant Satan en ifern d'an tân bras.

D'ar Pantecost, pa deuas dê ar Speret-Santel,  
Sant Pêr a voe ar c'henta o prezeg an Aviel,  
Maro hor Zalver, hac e convertis en un de  
E tuont pévar mil den ebars en eur c'hontre.

Sant Pêr a voe ar c'henta oc'h ober miracloù,  
O tisléria'n Aviel a Jesus hon Autrou;  
Tud hac a voa possedet gant Satan milliguet,  
Evel ma touche outo, e vijent delivret.

Cass a reas dirazàn calz a dud afflijet,  
Re glàn ha paralitig, hac ive leproset;  
Ar squeud demeus a Sant Pêr, el lec'h ma tremene,  
A roe d'an oll yec'het dre c'hraç a Zoue.

Gant conje an Ebestel eo soudan partiet  
Da vont d'a guær Samari gant San Yan beniguët,  
Da gass ar Speret-Santel d'ar Gristeniën neve,  
Hac evit o c'honfirma muïoc'h en graç Doue.

Er guær a Jerusalem e zoa bet prisonniët  
Gant ar Roue Herodes, eun den cruel meurbet,  
Carguet eus a chadennou e dreid hac e zaouarn,  
Eus e boanniou e c'hoardou a rê bouzard scouarn.

Nos-deïz e zoa en Ilis ebars en orêson,  
O pedi evit Sant Pêr, pini zo er prison,  
Ma pliche gant hor Zalver ma vije delivret  
Eus e zaouarn Herodes, a voa cruel meurbet.

Sant Pêr bars en e brison a zo chommet cousqet :  
Un Æl guenn a zo deuet en deus e zifunet :  
Me zo deut abers ho Mestr evit ho telivra ;  
Güisquit buan ho tillad ha va heuillit bremâ.

Tremen eure ar goardou hep beza tam güelet,  
Ar porsier eus ar prison o-unan digoret ;  
Rentet e voe gant an Æl er gambr gant miracl bras,  
Da gaout an Ebestel all, a voe glac'haret bras.

Satan o velet penos ez eo bet chassët  
Eus a douez ar Gristeniën gant ar Groas beniguët,  
En deus digasset eur monst'r demeus e gonsortet  
Simon ar Magicien eo an den milliguët.

Emân a voa eur sorcer, a lare' voa Doue,  
Dre ardou fall an diaoul sorceres bras a rê ;  
Sant Pêr, evel ma glêvas, da Rom e partias  
Gant Sant Marc, Avieler, a voa e vignon bras.

Bremâ Simon ar Sorcer a ra troyou plêsant ;  
Dirac an Impalaer en em chench en serpent ;  
Laqat ar mein en bara, ha mont e creiz an tân,  
Hep caout na drouc nac offañç dre c'hraç e vestr Satan.

Digueri rê'n dorojou pere vije serret,  
Delivra prisonnerrien a vije chadennet.  
E Rom en deus alumet eun tân voa qer puissant,  
Ma sônjet e voa dévet qær oll en un iostant.

Mes Sant Pêr, pa er güelas, a yas da gomz ountàn,  
Ha dirac an Impalaer a lavaras dezàn :  
Ret eo dîn digass eun den a vezo decedet ;  
An hini en ressucito a vo Doue credet.

Var eur blacen eus a Rom voe eun theatr savet  
Evit güelet ar miracl a dleye beza grêt ;  
Ha dre urz an Impalaer eur c'horf voe digasset,  
Pehini aboe tri mis a voa entêret.

Simon ar Magicien a gommanças qenta ;  
Ar maro a zao e benn, an diaoul eo emâ,  
Ar bobl oll e general a gommanç lavaret  
Penos voa Simon Doue ha Souveren ar bed.

An Abostol beniguet a voa var e zaoulin,  
Hac a bede a galon Jesus, hor Mestr divin ;  
Larat a ra d'ar maro, demeus a bers Doue,  
Sevel buan en e za ha retorn en bue.

An den-mâ neuze en e za zo savet :  
Hac ar bobl oll a grias : Doue ra vo meulet !  
Goude, Simon ar Sorcer, gant Satan possedet,  
A voe gant an diaoulou ac'hano anlevet.

Savet e voe qen huel gant an drouc-sperejou,  
Ma cuezas var an theatr, bruzunet e vemprou ;  
Mes an Impalaer Neron, den barbar ha brutal,  
A ras Prisonnia Sant Pêr neuze souden ractal.

Dastumet e voe gantàn ivez an Ebestel,  
Ila laqet en eur c'hachot eguis tud criminel ;  
Chadennet e voent ive en eur fêçon brutal,  
Ha laqet calz soudardet evit dont d'o dioüal.

Gant an instructionou eus an Abostolet,  
Ar goardou a voa laget nos ha deiz d'o miret  
A zo bet convertisset da lezen hor Zalver,  
Ar jolier, ar jolierez, o famill en antier.

Da rei dezo badiziant banne dour n'o d'oa get,  
Mes Doue a zisq̄uelas miracl en o andret :  
Eus ar roc'h e sortias eur feunteun ar gaera,  
A ra bepret miraclou bete'n heur a vramâ.

An Impalaer Neron, den cruel, milliguet,  
Ar Brincet eus o bales en deus bet assamlet,  
Da iovanti tourmantchou eus ar re gruella,  
Da dourmanti'n Ebestel voa prisonniet gantâ.

Sant Pêr demeus ar prison a zo bet sortiet,  
Pedet gant an Ebestel gant comzou calonec :  
Pardon, hor Prinç, emezo, a vramâ ni ho ped  
D'hon recommandi en oll d'hor Mestr bras beniguet.

Eur pennad demeus a Rom Sant Pêr en deus cavet  
E Vestr qer carantezus : Jesus a Nazaret  
Hac ar Zant pa er ḡuelas, a c'houlennas ountâ :  
Livirit din, va mestr qer, pelec'h e zit bremâ.

Jesus en deus consolet e Abostol santel  
Gant comzou carantezus, douç ha celestiel :  
Pelec'h e zàn da vont, Pêr, c'houi oc'h eus goulennet?  
Mont a ràn bremâ da Rom da veza crucifiet.

Sant Pêr evel ma clêvas comzou Salver ar bed,  
A douetas e voa én a vije crucifiet.  
Retorn a ras d'ar prison, mes gant eur galon vad,  
Da scuilla evit Jesus ar rest demeus e voad.

Sant Pêr ebars er prison pa zeo bet éruet,  
Ancourach ar Gristenien, pere zo dezolet :  
Souffromp gant paciantet, va breudeur, ar maro,  
Hac e vimp recompancet gant Jesus en énvou.

Casset d'an Impalaer, d'ar maro eo barnet ;  
Sant Paul, evel Romanist, a vezo dibennet,  
Ha Sant Pêr, evel Yuzeo, a vo crucifiet,  
Hac e dreid hac e zaouarn gant tachou vo staguët.

An Impalaer cruel en deveus ordrenet  
Ma vije an dud santel dirazàn divisqet,  
Ha staguët oc'h pillierou evit beza fouettet,  
Qen a deuje da scuiza ar bourrevien tygret.

Adieu, va c'hamaradet, a lavar Pêr da Baol ;  
Diganeoc'h e c'houlennàn pardon ha gant an oll.  
En em boqomp oll bremâ an eil hac eguile,  
Qent ma vezimp separet evit coll hor buë.

E humilite zantel a reas da Sant Pêr  
Goulen ma vije staguët er groas vel hor Zalver ;  
Gant calz a humilite en deveus goulennet  
Ma vije e benn d'an traôn dezàn, crucifiet.

Neuze bars er Vatican, pe Menez Aour hanvet,  
E voe cunduet ar Zant gant calz a zoudardet ;  
Laqet voe e benn d'an traôn ha tachet ouz ar groas ;  
Ma crie misericord an oll, bian ha bras.

Sant Pêr zo victorius, hac a rent e ene  
Etre daouarn e Vestr mad, Jesus, güir Vab Doue.  
An tosta eo d'hon Zalver ebars er Barados ;  
Protectour eo d'an Ilis evidomp deiz ha nos.

Ar c'horf santel a Zant Pêr a zo bet ambomet  
Dre soign eur bêleg santel, Marcel e zeo hanvet ;  
Ha laqet ebars eur bez precius bras meurbet,  
Peur-dost d'al leac'h ma voe ar Zant crucifiet.

An Abostol qer Sant Pêr en devoa pemp troatad,  
Douç, humbl, paciant, modest, mes eur figur vad ;  
E zaoulagad voa tener, rac meurbet e vouele,  
Abalamour m'en devoa nac'het güir Vab Doue.

Cetu eta , Christenien , Buez Autrou Sant Pêr ,  
Mellezour deomp , pec'herien , ebars e peb amzer ;  
Da vouela ar pec'hejou hon eus bet coumetet ,  
Hac e vezimp eveltân gant Jesus pardonet.

An Abostol bras Sant Pêr dre oll a zo pedet  
Ebars en oll Paressiou , e pévar c'horn ar bed ;  
Gantâ e mâ an alc'hoez demeus ar Barados :  
Pedomp-én ta , a galon ma zaimp d'y da repos.



FIN.

